

Z A P I S N I K

sa sastanka predsjednika sudova sa područja Zeničko-dobojskog kantona, održanog u Kantonalnom sudu u Zenici, u Sali za sjednice broj 17, II sprat, dana 22.05.2024. godine, sa početkom u 11,00 sati

Prisutni: Predsjednica Kantonalnog suda u Zenici Snježana Čolaković, predsjednik Općinskog suda u Kaknju Eldar Zaimović, predsjednik Općinskog suda u Zavidovićima Uzeir Kalabić, predsjednik Općinskog suda u Tešnju Zdravko Popović, sudija Općinskog suda u Žepču Zlatan Bosnić, predsjednica Općinskog suda u Zenici Dženana Brković, predsjednik Općinskog suda u Visokom Enes Behlulović, sekretar Ministarstva za pravosuđe i upravu Zeničko-dobojskog kantona Denis Bojinović, stručna savjetnica za odnose s javnošću Kantonalnog suda u Zenici Nada Stevanović

Odsutni: predsjednica Općinskog suda u Žepču Dragica Dragičević i ministar Ministarstva za pravosuđe i upravu Zeničko-dobojskog kantona Nebojša Nikolić iz razloga prisustva sjednici Skupštine Zeničko-dobojskog kantona.

Predsjednica suda pozdravlja prisutne, otvara sastanak i konstatuje da su svi pozvani prisutni, osim ministra Nebojše Nikolića i predsjednice Dragice Dragičević, koji danas imaju zamjenu, tako da su se stekli uslovi da se sastanak održi.

Prelazi se na utvrđivanje dnevnog reda i konstatuje se da nema primjedbi na predloženi dnevni red.

D n e v n i r e d:

1. Aktuelni problemi i aktivnosti u radu sudova s aspekta uslova rada, finansiranja troškova sudova i druga pitanja značajna za zakonito i pravilno funkcionisanje sudova u okviru njihove nadležnosti.
2. Razno.

Predsjednica suda konstatuje da su prisutni saglasni sa predloženim Dnevnim redom i da se može početi sa razmatranjem po tačkama Dnevnog reda.

Tačka 1.

Predsjednica Kantonalnog suda u Zenici poziva predsjednicu Općinskog suda u Zenici da iznese elaboraciju Općinskog suda u Zenici.

Predsjednica Općinskog suda u Zenici čita izvještaj.

Prevashodno želim da ukažem da značaj materijalne podrške ovom Sudu od strane EU i ZDK, zahvaljujući kojoj imamo na raspolaganju novi aneks zgrade suda i rekonstruisani dio postojeće zgrade suda, dakle bolje uslove rada, ali i pružamo još bolju uslugu građanima. Zahvaljujemo što ZDK ispunjava svoje obaveze određene memorandumom o razumijevanju.

Prijedlog dopune budžeta usmjeren je na osiguranje sredstava radi nabavke nedostajućeg protivpožarnog stabilnog sistema zbog čega je dobijena djelimična upotrebnna dozvola.

Predmetnu dopunu prijedloga budžeta za 2024. godinu Općinski sud u Zenici je dostavio resornom ministarstvu dana 19.12.2023. godine, uz pojašnjenje razloga podnošenja predmetne dopune. Naime, zbog nerealizovanih postupaka javnih nabavki koji se odnose na kapitalna ulaganja, a nisu se ni mogli predlagati u vrijeme izrade prijedloga budžeta za 2024.

godinu traženo je da se neiskorištena sredstva za 2023. godinu ponovo obezbijede za potrebe ovog suda, u odnosu na UPS sistem i stabilni sistem gašenja požara koji je po svim važećim propisima trebao da bude izgrađen u sklopu projektnih aktivnosti rekonstrukcije postojećeg dijela zgrade i izgradnje aneksa zgrade, a u skladu sa Elaboratom o zaštiti od požara na kojem se projekat i zasniva, a koji nije obezbijeden, a za koji smo i saznali nakon dostavljenog izvještaja Nadzornog organa.

Obzirom da je Ze-do kanton vlasnik postojeće zgrade kao i novoizgrađenog aneksa, te zbog zakonske obaveze rješavanja pitanja sigurnosti zgrade, servera i svih podataka i dokumentacije kojom sud raspolaže instaliranjem stabilnog sistema za gašenje požara, Ze-do kanton je odbijen sa zahtjevom za izdavanje odobrenja za upotrebu u suterenu dograđenog objekta u L formi objekta koji koristi Općinski sud u Zenici, pravosnažnim Rješenjem Službe za urbanizam Grada Zenica, broj 03-19-1211/23 od 09.01.2024. godine.

Kako bismo riješili problem, dostavili smo dopunu prijedloga budžeta u decembru 2023. godine, a potom i urgirali dobijanje, ako ne odluke barem informacije o navedenom. Do dana održavanja ovog sastanka odgovor nismo dobili. Ista je situacija i sa UP Sistema napajanja u vanrednim situacijama-UPS uređaj.

Također, i pored našeg pismenog traženja do sada od ministarstva nismo dobili traženi izvještaj Komisije za tehnički pregled izvedenih radova od 28.12.2023. godine koji je sastavni dio naprijed navedenog rješenja Službe za urbanizam Grada Zenica, broj 03-19-1211/23 od 09.01.2024. godine.

Dakle, još jednom pozivamo da ZDK razmotri pitanje osiguranja budžetskih sredstava za navedenu opremu.

Zbog nedostatnih sredstava donatora EU, te protivljenja da ZDK uloži sredstva za dovršetak radova na IV spratu aneksa, u tekućoj godini su obezbjeđena sredstva za te namjene. Međutim, još uvijek čekamo projekat koji je u obavezi resornog ministarstva, a koji će pored radova na IV spratu sadržavati i radove na rekonstrukciji zgrade ureda, kako je dogovoreno sa ministrom.

Predmetnu javnu nabavku, provodit će pored predstavnika ovog Suda i dva predstavnika Kantonalnog tužilaštva ZDK, obzirom da je postupajući po zahtjevu Kantonalnog tužilaštva ZDK, te saglasnosti ZDK i VSTV BiH, Sud sa tužilaštvom potpisao protokol o partnerstvu kojim se tužilaštvu ustupaju 4 kancelarije, kojem je prethodio pismeni akt resornog ministarstva (bez protokolarnog broja i potpisnika) da ukoliko ne želimo provoditi nabavku da to i napišemo, a u vezi je samog sadržaja protokola i nabavke, kako bi se sredstva prosljedila drugim pravosudnim institucijama.

Prema podacima kojim sud raspolaže uposleni suda nisu osigurani od posljedica nesretnog slučaja, ali se vrše aktivnosti u cilju zaključenja ugovora o osiguranju od strane ZDK. Cijenimo da je potrebno razmotriti pitanje i osiguranja imovine pravosudnih institucija u sklopu osiguranja uposlenih.

Općinski sud u Zenici je pilot sud u provođenju zadnje faze aktivnosti reorganizacije poslovnih procesa u sudovima, u okviru projekta koji VSTV BiH sprovodi u saradnji sa Švedskom sudskom administracijom, te da je VSTV BiH, a imajući u vidu dosadašnje rezultate koje su ostvarili sudovi u primjeni inoviranog modela rada, uključujući proaktivnost rada osoblja sudova, posebno predsjednika suda, na sjednici Vijeća, odlučilo da se za sudove mentore u procesu diseminacije novog modela rada odrede Općinski sud u Zenici, Općinski sud u Travniku, Općinski sud u Tuzli, Osnovni sud u Bijeljini i Osnovni sud u Doboju.

U okviru projektnih aktivnosti održano je više sastanaka i radionica, te odlučeno da se poduzmu sve aktivnosti u cilju uspostavljanja radnog mjesta stručnog saradnika za pružanje pomoći sudijama, jer je nedvojbeno, analizom relevantnih parametara, da ćemo upošljavanjem te kategorije državnih službenika, zasigurno postići efikasniji i kvalitetniji rad sudova, te u konačnom ostvariti uštede, jer bi se smanjila potreba za povećanjem broja sudova.

U vezi projektnih aktivnosti Komponente 4-Unapređenje radnih procesa za efikasniji izvršni postupak u pilot sudovima, te postupajući u skladu sa uputama Visokog sudskog i tužilačkog vijeća Bosne i Hercegovine za izradu zahtjeva za budžetskim sredstvima u cilju

unapređenja rada Izvršnih odjeljenja, stavljen je i prijedlog za osiguranje budžetskih sredstava za zapošljavanje 5 sudskih izvršitelja.

Molimo da resorno ministarstvo te Vlada ZDK podrži ove prijedloge, jer su usmjereni na efikasniji i kvalitetniji rad suda, a sredstva koja bi se obezbijedila ne predstavljaju 10% od sredstava koja po osnovu sudske takse ovaj sud unese u budžet svake godine.

Predsjednica Općinskog suda u Zenici završava svoje izlaganje.

Predsjednica Kantonalnog suda u Zenici poziva predsjednika Općinskog suda u Visokom da iznese elaboraciju Općinskog suda u Visokom.

Predsjednik Općinskog suda u Visokom čita izvještaj.

U 2024. godini Općinski sud u Visokom (u daljem tekstu: Sud) realizuje poslove i zadatke koji proističu iz obavljanja sudske funkcije u granicama svoje nadležnosti iz Ustava Federacije Bosne i Hercegovine i Zakona o sudovima u Federaciji Bosne i Hercegovine, Zakona o VSTV-u Bosne i Hercegovine, te drugih zakonskih i podzakonskih akata koje u okviru Ustava i Zakona pred Sud postave nadležni državni organi.

Zakonske i programske aktivnosti utvrđene su i godišnjim Rasporedom poslova sudija i stručnih saradnika za tekuću godinu, Rasporedom poslova zaposlenika Općinskog suda u Visokom imajući u vidu aktivnosti VSTV-a, te ciljeve definisane Strateškim planom sa Godišnjim programom rada za tekuću godinu i mjere utvrđene Planom integriteta Općinskog suda u Visokom.

U Općinskom sudu u Visokom trenutno sudijsku funkciju obavlja 13 sudija, uključujući i predsjednika suda i 3 stručna saradnika, koji su nosioci pravosudne funkcije.

Od 22.01.2024. godine na dužnost je stupio Amir Bajrić, novoimenovani sudija u Općinskom sudu u Visokom.

Sudiji Edibu Kučukoviću je prestao radni odnos u Općinskom sudu u Visokom sa 19.03.2024. godine zbog pravosnažne presude kojom je osuđen za krivično djelo za koje zakon predviđa kaznu zatvora.

Sudija Šejla Bakić-Šolbić imenovana je za sudiju Kantonalnog suda u Sarajevu i stupa na dužnost 01.07.2024. godine.

Predsjednik suda, sudije i stručni saradnici obavljaju poslove u sjedištu Općinskog suda u Visokom i u Odjeljenju izvan sjedišta suda u Olovu.

Nakon provedene procedure izbora i utvrđene liste sudija mentora za Općinski sud u Visokom, u skladu s članom 14. stav (2) i (3) Pravilnika o mentorstvu za novoimenovane sudije i stručne saradnike koje imenuje Visoko sudsko i tužilačko vijeće Bosne i Hercegovine ("Službeni glasnik Bosne i Hercegovine" broj: 83/22) Odjelu za unapređenje efikasnosti i kvaliteta rada u sudovima u Bosni i Hercegovini i Centru za edukaciju sudija i tužilaca u Federaciji Bosne i Hercegovine dostavljena je lista sudija mentora za Općinski sud u Visokom.

Odlukom o dodjeljivanju sudije mentora, sudija Amira Merdić određena je za sudiju mentora novoimenovanom sudiji Amiru Bajriću i započeta je provedba programa mentorstva definisana Okvirnim Programom mentorstva. Sudija mentor i novoimenovani sudija zajednički su izradili individualni program mentorstva kojim će se odrediti trajanje i dinamika provođenja mentorstva.

Za vršenje ostalih poslova iz nadležnosti Suda trenutno je zaposlenih 10 državnih službenika i 41 namještenik. U narednom periodu pokrenut će se procedura pribavljanja saglasnosti za popunjavanje upražnjenih radnih mjesta i prijem određenog broja državnih službenika i namještenika, jer se zbog promjene radnog mjesta i odlaska u penziju ukupan broj zaposlenika smanjio, a kadrovski deficit je veliki problem u ažurnoj realizaciji poslova.

Što se tiče statistike u radu Suda, u periodu od 01.01.2024. godine do dana sačinjavanja ove Elaboracije, na osnovu Izvještaja o protoku predmeta po referatima i vrstama utvrđeno je da je u Općinskom sudu u Visokom, uključujući i Odjeljenje izvan sjedišta suda u Olovu ukupan

broj neriješenih predmeta na početku godine 5137 neriješenih predmeta, primljenih u navedenom periodu je 3013 predmeta, a riješenih je 3320 predmeta, što znači da je koeficijent protoka 101,10%, odnosno riješenih je 1,10% više predmeta od priliva.

Uočava se da je priliv predmeta smanjen što iziskuje redovan nadzor i poduzimanje dodatnih aktivnosti radi ravnomjerne dodjele predmeta i stvaranje mogućnosti da nosioci pravosudnih funkcija budu u jednakoj prilici za ostvarenje orijentacione norme.

Na dan sačinjavanja ove informacije, Plan rješavanja predmeta je realizovan u procentu od 71,25%. Na sjednicama sudskih odjeljenja i sjednicama Stručnog kolegija vrši se analiza riješenosti Plana rješavanja predmeta sa posebnim osvrtom na najstarije predmete čiji broj se smanjuje, jer se na ovim predmetima aktivno radi i nastoje se stalnim angažmanom eliminisati faktori koji utiču na dužinu trajanja postupaka.

Kvalitet rada Suda za period 01.01. do 30.04.2024. godine je 91,58 %.

Vezano za uvjete rada i izazove sa kojim se suočavamo bitno je naglasiti da se i pored problema na globalnom planu, inflacije, porasta cijena, nedovoljnih finansijskih sredstava, teškoća i dužine trajanja postupaka javnih nabavki, a s druge strane, imajući u vidu potrebe za ažurno i efikasno obavljanje poslova, ostvaruju izuzetno dobri rezultati, te da su, u skladu s raspoloživim kapacitetima i resursima obezbijeđeni, uvjetno rečeno, adekvatni fizički uvjeti za rad i nabavljene potrebne robe i usluge.

Naime, problem na koji ukazujem već dugo je nefunkcionalna zgrada koja je obezbijeđena za potrebe suda, jer ne ispunjava standarde niti odgovara potrebama pravosudnih institucija. Zgrada sjedišta suda u Visokom nema: parking prostor, lift, prostor za arhivu, prostor za smještaj Odjeljenja za zemljišnoknjižne poslove, nema sporedni ulaz/izlaz za slučaj potrebe evakuacije niti službeni ulaz/izlaz za zaposlenike; stepenište je izuzetno usko i stvara teškoće prilikom kretanja, posebno starijim licima ili invalidnim osobama, a i zaposlenicima prilikom kretanja, nošenja predmeta, kao i korisnicima usluga suda. Odjeljenje za zemljišnoknjižne poslove i prostorije arhive u kojima se čuva kompletna registraturna građa smješteni su u zgradi koja je vlasništvo Grada Visoko, odnosno Gradske uprave (stara zgrada suda) i koje prostorije koristimo, za sada, bez plaćanja naknade.

Nedovoljan prostorni kapacitet dugoročno gledano, uz sve navedene činjenice, predstavlja najveći problem u smislu obezbjeđenja fizičkih uvjeta rada, posebno kad se uzme u obzir priroda posla, održavanje ročišta, postupci koje se vode pred sudom, sve usluge koje koriste građani u sudu i imajući u vidu da se radi o sudu koji vrši sudsku vlast za područje četiri općine.

Budžetom Zeničko-dobojskog kantona („Službene novine Zeničko-dobojskog kantona” broj: 21/23) za rad Općinskog suda u Visokom u 2024. godini obezbijeđena su finansijska sredstva u ukupnom iznosu od 3.689.200,00 KM koja se zakonito i efikasno koriste za namjene određene Budžetom. Međutim, imajući u vidu obim posla, objektivne potrebe Suda i upute VSTV-a, obezbijeđena finansijska sredstva nisu dovoljna.

Analizom izvršenja budžeta do 22.04.2024. godine procijenjeno je da na poziciji za bruto plaće i naknade zaposlenih nedostaje cca 330.000,00 KM, na poziciji Doprinosi poslodavca nedostaje cca 21.000,00 KM (imajući u vidu priznavanje prava na naknade u primjeni novog kolektivnog ugovora i povećanje osnovice za obračun plaće), na poziciji Izdaci za komunalne usluge nedostaje nam cca 70.000,00 KM i na poziciji Ugovorene i druge posebne usluge nedostaje cca 26.000,00 KM, što je posljedica nedovoljno osiguranih budžetskih sredstava na navedenim pozicijama, odnosno umanjениh u odnosu na iskazani budžetski zahtjev. Također su na poziciji Ugovorene i druge posebne usluge nedovoljna sredstva za obaveze prema Fondu za profesionalnu rehabilitaciju i zapošljavanje osoba sa invaliditetom.

Postupajući po aktu Ministarstva finansija broj: 07-03-01/11-7378/24 od 12.04.2024. godine za izradu Izmjena i dopuna Budžeta Zeničko-dobojskog kantona za 2024. godinu dostavljene su informacije o stvarnoj procjeni izvršenja rashoda i izdataka po pojedinačnim kodovima za Općinski sud u Visokom.

Finansijska sredstva potrebna za izvršenje Programa rada Suda za 2024. godinu, iskazana su u Budžetskom zahtjevu na bazi podataka o utrošku sredstava u tekućoj godini i

planiranog obima poslova i broja uposlenika u 2024. godini, koja sredstva su neophodna kao uvjet za ostvarenje zadataka planiranih programom rada Suda i realizaciju odluka VSTV-a.

Općinski sud u Visokom je u zakonskom roku usvojio i objavio Plan javnih nabavki kojim je predviđeno provođenje 44 postupka javne nabavke (16 postupaka za nabavku roba i 28 postupaka za nabavku usluga).

U zavisnosti od procijenjene vrijednosti, 39 je postupaka male vrijednosti, javne nabavke putem direktnog sporazuma i 4 postupka javne nabavke putem konkurentskog zahtjeva. Od ukupno planiranih 44 postupka javnih nabavki realizovanih je ili u fazi realizacije 41 postupak, a tri postupka javne nabavke će se provesti u narednom periodu.

Jedan od realizovanih postupaka je i nabavka usluge najma sistema centralizovanog štampanja na multifunkcijskim uređajima koji postupak je proveden u cilju optimizacije troškova uz obezbjeđenje kvalitetne opreme i početna analiza na bazi troškova za jedan mjesec ukazuje na ostvarene uštede uz poboljšan kvalitet ispisa.

Trenutno je u fazi provođenja postupak javne nabavke računara i računarske opreme koja zadovoljava sigurnosne zahtjeve za pristup novim servisima u skladu sa standardima utvrđenim od strane VSTV-a i rokom za obezbjeđenje ove opreme do 2025. godine. Za nabavku ove računarske opreme potrebno je izdvojiti značajna finansijska sredstva te je Sud opredijelio dinamiku nabavke u periodu od 2023.-2025. godine.

U svrhu izrade programa investicionog i tekućeg održavanja, kao jedna od projektnih aktivnosti organizovana je od strane VSTV-a posjeta i operativni sastanak sa predstavnikom VSTV-a na kojem su predstavljene projektne aktivnosti. U skladu sa Dokumentom okvirnog budžeta Suda i Priručnikom za planiranje tekućeg i investicionog održavanja zgrada sačinjen je i VSTV-u dostavljen Program tekućeg i investicionog održavanja za period 2024. do 2027. godine.

U skladu sa propisanim rokovima i obrascima, VSTV-u su dostavljeni Izvještaj o provedbi Plana integriteta i Strateški plan rada za period 2022.-2024. sa Godišnjim programom rada za 2024. godinu kao i Godišnji izvještaj o realizaciji trogodišnjih ciljeva suda i Godišnjeg programa rada za 2023. godinu.

Od 47 mjera koje je trebalo realizovati u 2023. godini prema rokovima iz Plana integriteta (rok realizacije 2023. godina, kontinuirane mjere sa datumom u 2023. godini i kontinuirane mjere bez datuma) ukupno je realizovanih 42, a nije realizovano 5 mjera u kojim se slučajevima radi o eksternim faktorima odnosno nemogućnosti realizacije mjera (nisu organizovane edukacije i sl.)

Aktivnosti u okviru Projekta harmonizacije podataka na nekretninama kojim upravlja Federalna uprava za geodetske i imovinsko-pravne poslove i dalje se provode, prema zvaničnim informacijama do jula 2024. godine.

Web stranica suda se svakodnevno ažurira sa aktuelnim informacijama, pravosnažnim presudama koje se objavljuju u skladu sa novim Smjernicama o objavi sudačkih odluka, a svi zahtjevi za pristup informacijama blagovremeno su riješeni.

Navedeni podaci ukazuju da se u Sudu poduzimaju aktivnosti i vrše poslovi koji doprinose efikasnom radu suda i obezbjeđuje zakonito i pravilno funkcionisanje suda u okviru zakonom propisane nadležnosti.

Predsjednik Općinskog suda u Visokom završava svoje izlaganje.

Predsjednica Kantonalnog suda u Zenici poziva predsjednika Općinskog suda u Kaknju da iznese elaboraciju Općinskog suda u Kaknju.

Predsjednik Općinskog suda u Kaknju čita izvještaj.

Što se tiče problema sa aspekta uslova rada, finansiranja troškova i slično, možemo reći da je ove godine Budžet za Općinski sud u Kaknju usvojen u do sada najvećem iznosu u dijelu kapitalnih ulaganja. Shodno tome sud je Planom javnih nabavki predvidio ta sredstva za

sljedeće nabavke: računarske opreme u iznosu od 91.000,00 KM; audiovizuelnu opremu za snimanje suđenja u iznosu od 6.000,00 KM; dodatnu opremu za videonadzor u iznosu od 2.600,00 KM; kopir aparat, televizor, nosač i platno za projektor u ukupnom iznosu od 3.420,00 KM, zatim namještaj 11.000,00 KM; određeni dio opreme za opremanje sigurnosne prostorije u iznosu od 19.147,00 KM.

Značajna sredstva u iznosu od skoro 240.000,00 KM su planirana na nabavku radova i to rekonstrukcije kompletne elektro i LAN mreže u zgradi, protivpožarnog alarmnog sistema i protivpožarnih stepenica. Neke od gore planiranih nabavki sud je okončao i proveo, dok su neke u toku ili u planu za naredni period kalendarske godine.

Od značajnijeg kapitalnog ulaganja, za koja su sredstva obezbjeđena u prethodnom Budžetu, važno je istaći da smo uspješno okončali ugradnju lifta-vertikalne platforme za pristup licima s umanjanim tjelesnim sposobnostima u zgradu suda. Naime, 05.03.2024.godine, činom dobijanja upotrebne dozvole, ovaj projekat je zvanično realizovan i lift je stavljen u upotrebu. Na ovaj način realizovan je jedan važan strateški cilj Općinskog suda u Kaknju definisan Strateškim planom rada i Godišnjim programom rada za 2024. godinu, te omogućeno pravo na pristup javnim objektima pod jednakim uslovima za sve građane koje je zagarantovano nizom međunarodnih konvencija.

Problematika koja je skoro pa uvijek aktuelna, je nedostatak ljudskih resursa usljed dugotrajnih bolovanja, porodiljskih odsustava, pa i napuštanja radnih mjesta. Naime, u Općinskom sudu u Kaknju od 05.02.2024. godine jedan sudija je na bolovanju, te su već stečeni uslovi i za korekciju Plana rješavanja predmeta za 2024. godinu, te u saradnji sa VSTV-om utvrđen je način korekcije koji je u toku.

Dva daktilografa su na zvaničnom porodiljskom odsustvu od kraja septembra i oktobra prošle godine, a još od ranije su zbog bolovanja uzrokovanog trudnoćom odsustvovali sa posla. U uslovima kada sud ima 8 NPF i 8 daktilografa, nedostatak 2 daktilografa itekako izaziva problem. Također i u odjeljenju za zemljišno-knjižne poslove jedan namještenik je zbog bolovanja odsutan godinu i pet mjeseci. Za popunjavanje ovih radnih mjesta na određeno radno vrijeme, saglasnost smo dobili tek 03.04.2024.godine, iako smo blagovremeno još u junu prošle godine podnijeli zahtjev nadležnim ministarstvima. Tako da unatoč ranijem dogovoru sa nadležnima po pitanju ubrzanja procedure prikupljanja saglasnosti za popunu upražnjenih radnih mjesta, ta dinamika i dalje nije zadovoljavajuća, iako je resorno ministarstvo blagovremeno i brzo dostavilo suglasnost, te je očigledno da se javlja kašnjenje na trećoj instanci-Komisiji.

Problematika na koju niz godina ukazujemo odnosi se i na status zgrade suda koja je u vlasništvu Općine Kakanj, a koja se knjiži kao stalno sredstvo kantona. Revizorski izvještaj je ukazao na nepravilnost u tom dijelu knjiženja, međutim, kako je to je nadležnost vlasnika zgrade i eventualno nekog budućeg statusa nakon dogovora sa kantonom, sud i dalje knjiži zgradu kao stalno sredstvo ZDK.

Eventualni problemi sa aspekta finansiranja sigurno će se pojaviti na poziciji za bruto plaće i naknade zaposlenih, no vjerujemo da će rebalansom budžeta to biti prevaziđeno.

Svi predviđeni izvještaji o radu za prošlu godinu su urađeni i dostavljeni u januaru tekuće godine, Plan javnih nabavki usvojen dana 29.01.2024. godine objavljen na web stranici suda, u toku je provođenje postupaka nabavki.

Ocjene NPF-a i državnih službenika i namještenika su blagovremeno izvršene o čemu je dostavljen izvještaj o provedenom postupku ocjenjivanja VSTV-u i Agenciji za državnu službu. Iz oblasti radnih odnosa u izvještajnom periodu su blagovremeno donesena rješenja o korištenju godišnjih odmora, plaćenih odsustava/odmora, rješenja o korekciji plaća NPF-a, rješenja o priznavanju prava na novčanu pomoć za slučaj teške tjelesne povrede/bolesti namještenika ili članova uže porodice. Shodno odredbama novog Kolektivnog ugovora za službenike organa uprave i sudske vlasti u Federaciji Bosne i Hercegovine, te pristupanja Vlade ZDK istom, za namještenike koje su u pripravnosti od aprila mjeseca smo počeli priznavati pravo na naknadu po tom osnovu.

U skladu sa Programom stručnog usavršavanja za 2024.godinu JU CEST FBiH, ovaj Sud je blagovremeno, dostavio prijavne listove za seminare iz Programa stručnog usavršavanja

za sve sudije, stručnu saradnicu, pripravnike, državne službenike i namještenike. Kroz CMS se ažurno evidentiraju prisustva seminarima, kao i kroz mjesečnu knjigu satnica. Također i prema Programu obuke iz Kataloga obuke za 2024. godinu koju organizuje Agencija za državnu službu FBiH, kontinuirano se vrše prijave državnih službenika i namještenika na obuke shodno temama obuka i radnim mjestima.

Općinski sud u Kaknju je VSTV-u dostavio ažurirani Strateški plan rada sa Godišnjim programom rada za 2024. godinu, te Godišnji izvještaj o realizaciji trogodišnjih ciljeva suda i Godišnjeg programa rada za 2023. godinu dana 27.02.2024. godine. Izvještaj o provedbi Plana integriteta suda je blagovremeno dostavljen VSTV-u dana 22.04.2024. godine, upload-ovanjem istog kroz aplikaciju.

Web stranica se redovno ažurira.

Ističemo da je Općinski sud u Kaknju pristupio Memorandumu i projektnim aktivnostima za unapređenje kvalitete rada krivičnih odjeljenja u sudovima ZDK, te zaključio Memorandum o sporazumijevanju sa Pravnim fakultetom UNZE čime su implementirane Smjernice o dugoročnoj saradnji pravosudnih institucija i pravnih fakulteta u Bosni i Hercegovini u oblasti praktičnog usavršavanja studenata, koje je usvojilo Visoko sudsko i tužilačko vijeće BiH.

Predsjednik Općinskog suda u Kaknju završava svoje izlaganje.

Predsjednica Kantonalnog suda u Zenici poziva sudiju Općinskog suda u Žepču da iznese elaboraciju Općinskog suda u Žepču.

Sudija Općinskog suda u Žepču čita izvještaj.

Aktualni problemi rada Općinskog suda u Žepču i dalje se ogledaju u kadrovskoj nepopunjenosti nositelja pravosudnih funkcija (jedan sudac je pod suspenzijom, a za jednog suca je u tijeku raspisan natječaj od strane VSTV-a), kao i nepopunjena mjesta jednog Višeg stručnog suradnika - zemljišno knjižni referent VSS, 1 čistačica SSS, kao i 2 pripravnika VSS.

Općinski sud u Žepču je u desetom mjesecu 2022. preselio u novu zgradu suda koja je opremljena novim uredskim namještajem, kao i novom računalskom opremom. Za tu namjenu utrošeno je 165.000,00 KM.

Što se tiče kapitalnih ulaganja u 2023. godini, Općinski sud u Žepču je izvršio uređenje sigurnosne prostorije po standardima koje je propisalo nadležno ministarstvo i za tu namjenu je utrošeno 15.000,00 KM.

Općinski sud u Žepču je dostavio vladi ZDK proračunski zahtjev za 2024. godinu i isti je umanjen za 99.712,00 KM. Odobren Proračun za 2024. godinu iznosu od 1.154,160,00 KM kako bi Općinski sud u Žepču mogao uspješno funkcionirati.

Što se tiče novih uposlenja, Općinskom sudu u Žepču su odobrena sredstva za prijem novih uposlenika i to: 1 ZK asistent SSS, 1 viši stručni suradnik - zemljišno knjižni referent VSS, 1 čistačica SSS, kao i 2 pripravnika VSS.

Od kapitalnih ulaganja u proračunu za 2024. godinu su odobrena sredstva u iznosu od 26.400,00 KM za nabavku agregata i skenera za arhivu.

Pored ovih aktivnosti predsjednica suda je pokrenula procedure u pravcu pribavljanja potrebnih suglasnosti za popunu upražnjenih pozicija, kako bi se prevazišao ovaj problem.

Poslovi upražnjenih pozicija dodijeljeni su u rad uposlenim namještenicima, te je pored osnovnog referata utvrđena dodatna obaveza namještenika donošenjem rješenja o privremenom obavljanju poslova drugog radnog mjesta do popune upražnjenog radnog mjesta.

Izvršenje Proračuna za prvi kvartal 2024. godine (izdaci za plaće i naknade i izdaci za nabavku materijala i usluga) za prvi kvartal 2024. godine iznosi 244.841,00 KM ili u procentima 21,2%.

Mogući problem za nedostajućim sredstvima na poziciji plaća i naknada su (naknade za aktivnu i pasivnu dežuru sudaca, visina osnovice za obračun plaća namještenika koja je

povećana poslije usvajanja proračuna) i koja nisu planirana u proračunskom zahtjevu za 2024. godinu i izdaci za ugovorene usluge (branitelji po službenoj dužnosti).

Sudija Općinskog suda u Žepču završava svoje izlaganje.

Predsjednica Kantonalnog suda u Zenici poziva predsjednika Općinskog suda u Zavidovićima da iznese elaboraciju Općinskog suda u Zavidovićima.

Predsjednik Općinskog suda u Zavidovićima čita izvještaj.

U Općinskom sudu u Zavidovićima imenovano je 9 redovnih sudija, uključujući i predsjednika suda, 1 dodatni sudija i 2 stručna suradnika. Kada je u pitanju upošljavanje državnih službenika i namještenika u 2024. godini, u ovom sudu je u tijeku postupak prijema 4 namještenika i 2 državna službenika. Za još jedno mjesto namještenika je podnesen zahtjev za dobivanje suglasnosti za popunu upražnjenog radnog mjesta.

Općinski sud u Zavidovićima u svom poslovanju nastoji poštivati sve zakonske rokove. U tu svrhu usvojen je Strateški plan rada 2022.-2024., Plan integriteta, Godišnji program rada za 2024. godinu, Plan rješavanja predmeta, Odluka o predvidivim rokovima i dr., te se aktivno radi na realizaciji svih ovih planova i strategija.

Aktivno se provode i mjere Akcionog plana za brže rješavanje predmeta krivičnog djela korupcije i organiziranog kriminala.

Ovaj sud redovito izvršava sve obveze kada je u pitanju ostvarivanje godišnje norme suda, tako da se očekuje prebačaj prosječne godišnje norme suda i za 2024. godinu, odnosno ostvarenje prosječne godišnje norme suda u procentu većem od 100 %.

I u 2024. godini sve sudije pohađaju obveznu edukaciju u organizaciji CEST-a, a interno stručno usavršavanje realizira se nabavkom stručne literature, redovitim praćenjem službenih listova te redovnim održavanjem sjednica sudskih odjeljenja, internom elektronskom razmjenom raznih sudskih odluka i sl.

Svim sudijama i stručnim suradnicima omogućen je uvid u drugostepene sudske odluke i odluke po reviziji koje od viših sudskih instanci budu vraćeni u ovaj sud čime se doprinosi ujednačavanju sudske prakse u ovom sudu. Pored navedenog, sudsku praksu sudije i stručni suradnici prate putem stručne literature koja se nabavlja u sudu, putem interneta i putem Centra za sudsku dokumentaciju VSTV-a BiH.

Preko web stranice ovog suda omogućen je svim strankama u postupku uvid u predmete putem interneta, kao i dobivanje informacija o zakazanim ročištima i drugih korisnih informacija.

Kada su u pitanju uvjeti rada potrebno je napomenuti da je sud usprkos svim finansijskim problemima, u 2024. godini, uspio nabaviti sav potreban materijal (papir, koverte, omote, tonere, ...) za neometan rad suda. Nabavljen je i veći broj polica za potrebe pisarnice i arhive suda, a u planu je i nabavka i preostalog dijela potrebnih računara i računarske opreme. Za najam sistema centraliziranog štampanja na snazi je trogodišnji okvirni sporazum iz protekle godine.

Radi dotrajale vanjske i unutarnje stolarije, u tijeku je postupak nabavke i ugradnje preostalog dijela prozora na zgradi suda.

Općinski sud u Zavidovićima susreće se sa nizom problema koji utječu na rad suda, od kojih posebno treba istaknuti nedovoljno finansijskih sredstava za nabavku potrebnog materijala, opreme i obavljanje nužnih popravaka i nepopunjenost svih predviđenih radnih mjesta. Smatramo da je procedura oko tražnja potrebnih suglasnosti za popunjavanje upražnjenih radnih mjesta nepotrebna i složena, jer su sva radna mjesta koja su upražnjena već predviđena Pravilnikom o unutrašnjoj organizaciji i sistematizaciji radnih mjesta za koji je već pribavljena suglasnost nadležnih tijela.

A posebno treba istaći i to da se u najvećem broju slučajeva radi o popuni radnih mjesta koja su iz nekog razloga ostala upražnjena (odlazak u mirovinu, zasnivanje radnog odnosa ranijeg uposlenika u drugom organu i sl.).

Poseban problem u organiziranju rada suda predstavlja popunjavanje radnih mjesta za uposlenike koji su na bolovanju, jer je popunjavanje radnih mjesta u tim slučajevima hitno, zbog remećenja u radu suda iznenadnim odlaskom uposlenika na bolovanje, a sama procedura upošljavanja je dodatno zakomplicirana i usporena zbog potrebe traženja suglasnosti za popunjavanjem upražnjenog radnog mjesta i u ovakvim slučajevima.

Predsjednik Općinskog suda u Zavidovićima završava svoje izlaganje.

Predsjednica Kantonalnog suda u Zenici poziva predsjednika Općinskog suda u Tešnju da iznese elaboraciju Općinskog suda u Tešnju.

Predsjednik Općinskog suda u Tešnju čita izvještaj.

Budžet Općinskog suda u Tešnju za 2024. godinu iznosi 2.139.517,00 KM. Izvršenja budžeta sa 31.03.2024. godine iznosilo je 503.952,00 KM. Da bi Sud mogao redovno obavljati svoju funkciju zbog koje je osnovan bilo je neophodno kroz rebalans Budžeta obezbijediti nedostajuća sredstva u iznosu od 499.615 KM (306.453 za postojeći broj zaposlenih i 193.162 za upražnjena radna mjesta), a sve u skladu sa usvojenim Izmjenama i dopunama Pravilnika o unutrašnjoj organizaciji i sistematizaciji radnih mjesta u Općinskom sudu Tešanj broj: 09-45-133-1/24 od 19.02.2024. godine koji je odobren i usvojen od strane Federalnog Ministarstva Pravde i Ministarstva za Pravosuđe i Upravu ZDK.

Usvajanjem rebalansa u iznosu od 499.615 KM Budžet Općinskog suda bi iznosio 2.639,132 KM. Ovo povećanje Budžeta za 2024. godinu posljedica je sljedećih faktora: povećanja plaća sudija od 01.01.2024. godine za 12,5%, povećanjem plaća državnih službenika i namještenika u Zeničko-dobojskom kantonu od 01.01.2024. godine za 9,5%, povećanjem plaća toplog obroka državnih službenika i namještenika u Zeničko-dobojskom kantonu u zavisnosti od povećanja prosječne plaće u FBiH u 2024. godini, primjenom Uredbe o naknadama sudaca i tužitelja u pravosudnim institucijama broj: 02-02-14754/23 od 28.09.2023. godine, za obračun dežurstva/pripravnosti, ista je direktno povezana sa povećanjem plaće, a kreće se u rasponu od 7%-25% u zavisnosti u koje dane se obavlja pripravnost, te naknade za odvojen život i smještaj u mjestu rada od 17.10.2023. godine i Primjenom člana 27. stav 4. Kolektivnog ugovora za službenike organa uprave i sudske vlasti u FBiH, od 27.03.2024. godine, ostvaruje se pravo na naknadu za pripravnost namještenika, koja ne može biti manja od 0,2% od prosječne plaće u FBiH, a niti veća od 20% prosječne plaće u FBiH, te je ista promjenljiva veličina i u direktnoj zavisnosti od rasta prosječne plaće u FBiH.

Zvanična inflacija u BiH za 2024. godini iznosi 17%, te je to dovelo do poskupljenja svih roba i usluga koje ovaj sud nabavlja za svoje potrebe i rad, čak i do 50% u odnosu na isti period prošle godine. Došlo je do poskupljenja vode, komunalija, grijanja, poštanih usluga. Takođe, došlo je do poskupljenja roba i opreme koje nabavlja ovaj sud za svoj redovan rad.

Općinski sud u Tešnju od samog prelaska u novu zgradu ima problem arhivskog prostora. Arhiva ovog suda se nalazi u dijelu pisarnice koji je apsolutno neuslovan sa aspekta zaštite od požara i ne ispunjava niti jedan uslov koji je propisan za zaštitu i rukovanje arhivom. Sud planira u budžetskom prijedlogu za 2024. godinu sredstva za dogradnju objekta kojim bi se trajno riješilo pitanje arhivskog prostora Općinskog suda u Tešnju. U tom cilju nadam se da ćemo imati adekvatnu Vašu podršku kao i resornog ministra prilikom usvajanja budžeta za 2024. godinu Općinskog suda u Tešnju.

U 2024. godini neophodno je izvršiti nabavku računarske opreme koja je dotrajala, nema sadašnju vrijednost samo upotrebnu, a to dovodi do povećanja troškova popravke i servisiranja iste. Pored navedenog računarska oprema ovog suda samo djelimično ispunjava uslove postavljene od strane VSTV-a.

Pored računarske opreme neophodno je nabaviti i drugu opremu, a sve u cilju obezbjeđenja redovnog i efikasnijeg rada ovog suda: izvršiti klimatizaciju zgrade, popravku sistema grijanja na kojem je potrebno izvršiti zamjenu cijevi i pojedinih grijnih tijela zbog dotrajalosti i kvarova.

Generalno zbog povećanja cijene grijanja koja trenutno iznosi cca 8 KM po m², potrebno je pokrenuti inicijativu za utopljanje objekta Općinskog suda u Tešnju kroz energetska efikasnost i kroz projekat toplotne pumpe i sl., preći na drugi režim toplotnog grijanja, a što bi dovelo do uštede sredstva u budžetu Općinskog suda u Tešnju.

Općinski sud u Tešnju je smješten u objekat koji je izgrađen 2010. godine. Od 2010. godine do 2023. godine nije ulagano značajnije u održavanje objekta. U 2023. godini utrošeno je 24.452,00 KM na redovno održavanje objekta i to popravka krova, izolacije na krovu, zamjena oluka i odvoda, popravku ograde i krečenje, kao i djelimično klimatiziranje prostorija iz razloga što je došlo do neotklonjivog kvara na centralnom uređaju za klimatizaciju. (Ista je oštećena u poplavi 2014. godine).

Usvojenim Izmjenama i dopunama Pravilnika o unutrašnjoj organizaciji i sistematizaciji radnih mjesta u Općinskom sudu Tešanj broj: 09-45-133-1/24 od 19.02.2024. godine koji je odobren i usvojen od strane Federalnog ministarstva pravde i Ministarstva za pravosuđe i upravu ZDK, kroz rebalans Budžeta neophodno je obezbijediti sredstva u iznosu od 193.162 KM za sljedeća upražnjena mjesta u ovom sudu: Redovni sudija (odobren od strane VSTV-a), Šef pisarnice, Stručni savjetnik u ZK uredu, Šef odsjeka za opće i računovodstveno-materijalne poslove, Višeg referenta za računovodstveno-materijalne poslove, jednog upisničara, jednog vozača i jednog domara.

Usvajanjem istog omogućava se svrsishodnije planiranje sredstava u Budžetu kao i transparentniji nastup prema Ministarstvu za pravosuđe i upravu i Ministarstvu finansija. Što se tiče aktuelnih problema u radu suda, sa aspekta uslova u radu, tu je konstantan problem bio da se teško i sporo vrše popune upražnjenih radnih mjesta što dodatno otežava rad ovog suda.

Potrebno je ubrzati procedure davanja saglasnosti od nadležnih kantonalnih ministarstva ili ih pojednostaviti tako da od momenta pojavljivanja upražnenog radnog mjesta (davanjem otkaza od zaposlenika, odlaskom u penziju i dr.) pa do raspisivanja javnog oglasa prođe što manje vremena. Trenutna praksa je da procedure traju i do 6 mjeseci.

Što se tiče uslova rada, u sudu je djelimično smanjeno nezadovoljstvo državnih službenika i namještenika u pogledu njihovih plaća i naknada kroz potpisivanje novog kolektivnog ugovora, te se nadamo da će postojeća vlada i dalje aktivno učestvovati na poboljšavanju radnopravnog statusa istih, a što direktno utiče na efikasnije obavljanje poslova iz nadležnosti ovog suda.

Predsjednik Općinskog suda u Tešnju završava svoje izlaganje.

Predsjednica Kantonalnog suda u Zenici Snježana Čolaković

Predsjednica suda izjavi da su rezultati rada Kantonalnog suda u Zenici veoma dobri, a da ti rezultati ne bi bili takvi da nema dobre saradnje sa resornim ministarstvom. Predsjednica suda se zahvaljuje ministru i prisutnom sekretaru na dobroj saradnji. Predsjednica poziva sekretara da podrži zahtjev Kantonalnog suda u Zenici za rebalans budžeta u pogledu stavke koja se odnosi na službene odbrane. Nadalje, predsjednica predlaže sekretaru i da se ubrzaju procedure vezane za popunjavanje upražnjenih radnih mjesta u pravosudnim institucijama Ze-do kantona.

Sekretar izjavi da je rebalans budžeta u završnoj fazi i da će izmjenama biti obuhvaćeni i današnji zahtjevi sudova. Što se tiče davanja saglasnosti za prijem novih zaposlenika (popunjavanje upražnjenih radnih pozicija), sekretar ističe da nije do resornog ministarstva već do komisije. Predlaže da se pošalje urgencija komisiji i dodaje da ima saznanja da će se komisija vrlo brzo sastati i odlučiti o svim zahtjevima.

Zaključak:

1. Da Ministarstvo za pravosuđe i upravu Ze-do kantona pažljivo izanalizira sadržaj današnjih izlaganja predsjednika sudova sa područja Ze-do kantona i iskaže svoj stav na sadržaj prijedloga, zahtjeva i slično.
2. Da se ubrza procedura vezana za davanja saglasnosti za popunu upražnjenih radnih pozicija. Ovo posebno u situaciji kada već postoje novčana sredstava koja se odnose na isplatu plaća.

Tačka 2.

Predsjednica suda predlaže da tema na narednom sastanku predsjednika sudova bude pitanje zgrade sudova, te predlaže da se sastanak održi u prostorijama nekog od općinskih sudova.

Prisutni izjaviše da su saglasni.

Prisutni žele da istaknu i pohvale dobru saradnju sa ministrom za pravosuđe i upravu, kako u ranijem tako i u sadašnjem mandatu.

Predsjednica suda je zaključila zajedničku sjednicu predsjednika sudova i prisutnim se zahvalila na dolasku.

Sastanak završen u 12,30 sati.

Zapisničar
Nada Stevanović



Predsjednica suda

Snježana Čolaković